

四庫全書

史部

欽定四庫全書

史部

平定朔漢方略卷三十三

三十二

詳校官編修臣曹振鏞

編修臣裴謙覆勘

總校官進士臣繆琪

校對官中書臣鮑之鍾

騰錄監生臣黃譽

欽定四庫全書

聖祖仁皇帝親征平定朔漠方略卷三十

戊辰

命撥大臣領兵起行內大臣公常泰為領兵起行事
開列出征大臣職名入奏

上曰左翼營內以內大臣馬思喀都統公俄倫代護軍
統領宗室塞稜格主之右翼營內以內大臣公常
泰都統侯巴渾德都統齊實主之其餘大臣各隨

本翼隸在營內其前鋒營自有本翼大臣其去時
四營左翼之營于十七日起行其次十八日右翼
之營起行自此次第起行再傳諭大臣兵丁云馬
匹關係重大從夜拴至天明天明之後放嚙青草
再緩緩起行則馬不勞此時雖不忌水然係肥馬
仍以緩飲為宜朕于各驛俱備有草料爾等行路
一日行一站為宜則馬畜不勞矣

命給出征官兵行餉

上諭大學士伊桑阿曰此番出兵諸王以下及大小官員俱照今年出征例給兩個月行餉如在前出兵今次又往則各賞銀十兩朕將往駐蹕驛中每驛使備空草以喂出兵者之馬照各處定例散給

尚書圖納等以招撫噶爾丹屬下人及西喇古爾番人之事奏

聞圖納等奏臣欽遵

上諭乘驛速行至于莊浪會同總督吳赫提督李林隆

署理巡撫事布政使郭洪西涼總兵官韓弼等
訪問噶爾丹征賦之西喇古爾番人俱云在甘
州附近地方是以臣等親身俱前進甘州因西
寧距甘州一千二百餘里而地方緊要故遣總
兵官韓弼回西寧臣等往甘州詳查噶爾丹征
賦之西喇古爾番人遣副將衛勳游擊張當之
守備王良柱通事俞嘉心宣諭

皇帝仁德告以勦滅噶爾丹之故西喇古爾黃番人大

頭目厄勒者爾順等黑番人大頭目喇咱噶卜
楚等俱大歡悅率其下次等衆頭目來降計西
喇古爾黃番人大小六千七十九口黑番人大
小一千一百六十九口及噶爾丹下管轄番人
坐征賦稅之厄魯特達爾漢寨桑布爾奇寨桑
塞稜丹巴等自十五歲以上一百一十九口十
四歲以下六十口男婦大小共一百七十九口
亦率之來降上三項人共七千四百二十七口

此等坐征賦稅噶爾丹下人皆係厄魯特不便
仍留本處故撥游擊侯定之守備劉金玉千總
周文梁把總張英從驛解京至西喇古爾黃番
黑番人數甚多不便遷來且既將管轄伊等坐
征賦稅之厄魯特離彼遷來故不復遷番人止
將邊外所有番人俱遷入邊內矣為此奏

聞

上曰西喇古爾番人向來納賦於噶爾丹送硫黃倭鉛

諸物頃以噶爾丹大敗遁逃特遣大臣曉諭招撫
覽圖納奏黃番黑番人及噶爾丹下管轄番人坐
征賦稅七千四百餘口俱誠心歸順分別解京安
插已悉知之矣并令所司知之

已已

諭大將軍伯費揚古相機行事時費揚古因

欽差卓力克圖達爾漢巴克什及丹濟喇所遣察哈
代等到後遣郎中本什押護入奏之時使口奏

行事謹候

訓旨乃發

勅諭費揚古曰爾賈奏本什到後情事已悉今丹濟喇雖乞降而噶爾丹之奏未至雖不來降破壞已盡如或來降大將軍可婉言誘至歸化城以便共商措置若遣其使至朕前於朕甚難不得不降旨許降如據旨來降不便有異議矣今丹濟喇以下通使仍遣來入見如噶爾丹遣使爾即覆之言我

乃大將軍凡事皆我所主吾主殆不違吾言也今爾等往奏而歸天氣愈寒恐爾諸人盡至凍死爾等可即歸諭噶爾丹來降其時我當為爾陳奏加之獎賞作速遣回此項事一面奏聞一面大加防備防備之事馬匹為要朕統軍而行見我兵之勇無復遺議但不經心防馬萬一詐降夜中乘我無備驅馬而出所關匪淺爾等諳練之人無不經歷之事偶以朕慮所及一為書之朕一聞噶爾丹聲

息即以京中所喂之馬給兵乘坐親于九月十九日出行赴歸化城此際情形仍當奏報朕心不勝喜悅急欲得其實音特諭

命嚴禁外藩蒙古偷盜馬匹

上諭理藩院曰是役之行經蒙古地方官兵馬馳擺站馬匹關係重大爾衙門可檄外藩衆札薩克喀爾喀札薩克各自嚴禁本旗盜賊如竊取官兵馬馳擺站馬匹什物借交易為名而來偷盜立正軍法

梟首示衆抄沒子女家產入官該札薩克管轄人員從重治罪嚴行傳諭可也

命封車陵達什為輔國公

上諭尚書馬齊等曰喀爾喀札薩克厄爾德尼阿海台吉下一等台吉車陵達什是役軍中効力供應公差馬匹食物略無遲悞良可嘉也著照車木楚克納木札爾例封為輔國公

命速授善巴盆素克

封冊先是議政大臣奏封善巴為和碩親王優封盆素克為多羅郡王

命作速撰冊差官送往至是理藩院奏言吏部撰完善巴盆素克

封冊送到臣衙門應差衙門官一員乘驛星速送往上命速發授封

命增發坐塘筆帖式理藩院奏請坐塘部院筆帖式再撥八員又今年出兵理藩院撥什庫應以兵

丁給剌馬匹并選各旗馬內有臆者每撥什庫
各取二匹乘坐

上從之

庚午

諭諸大臣追討噶爾丹情事時厄魯特格壘古英寨
桑等遣察罕哈什哈來請降

上諭大學士伊桑阿等曰近有厄魯特格壘古英寨桑
乃噶爾丹信任之大臣遣使請降言噶爾丹困窮

已極糗糧廬帳皆無四向已無去路狼狽不堪目
下掘草根為食八月初四日大雪深數尺昔謂蒙
古之地不論經由何方皆可以行難以尋覓由今
觀之皆有一定行路一定住處不可妄行亦不能
妄住欲覓噶爾丹所在亦無所難草木非人所食
惟厄魯特乃能延至此時他人何以堪此伊桑阿
阿蘭泰奏曰天時正寒如此窮困何以能久王
熙奏曰食草木之根如何可久及今不降自求

死也張玉書李天馥奏曰如此窮困何以度冬乎

壬申

駕發京城巡行北邊經理機務

命都御史于成龍赴歸化城理西路糧務

上諭大學士伊桑阿曰中路之糧俱已安貯于成龍李
鈞喀拜在此無事西路糧務尚未措置畢著伊等
自備馬匹乘坐明日即行過駐蹕所赴歸化城同

理西路糧務

遣人賚

勅往詰大將軍伯費揚古費揚古等奏據西安正藍旗索保佐領下小撥什庫阿蘭泰鑲藍旗漢軍驍騎張正宗來報曰我等乃駐劄翁金之兵副都統祖良璧等議餘米不多兵丁住此已將至五十一日當分給此米起行遂以米盡給兵丁我等于本月初六清晨起程而來行至十五里

外突遇厄魯特二千餘賊副都統祖良璧等率官兵接戰挫之我等因而內來問阿蘭泰曰祖良璧等如何矣言我等被截向內而來不知祖良璧如何奏至發

勅詰大將軍伯費揚古曰爾以翁金守米副都統祖良璧等之事具疏來奏于九月十九日早駕發之時已到行在前五月十三交戰以來曾為西路尾後之事發勅書部文俱有案卷何待朕言此數月

不撤者何故遣將軍舒恕侍郎滿丕前去者又何故爾之前往又何事朕實不解朕一人在京獨以西路所闕意所不到之事種種言之衆心俱不之服今果如吾言矣噶爾丹困窮已極早晚凍死如遣大僚人員往撫此大機會正為之喜今與之戰則降者必懼而止且又收其帳房鍋釜朕深以不及撤兵為憾又疏內並不開翁金有兵幾何將領為誰器械如何其戰久否如何被挫此撥什庫驍

騎何以得脫懸度之不勝悶人嗣後一槩奏事必
開明始末為宜特諭

上又命內大臣策旺諾爾布一等侍衛俄齊爾杜喇爾
赴大將軍伯費揚古所曰可傳旨諭大將軍伯
費揚古朕出張家口沿邊而行著大將軍不時探
聽噶爾丹聲息來奏

命刊發招撫噶爾丹勅文通行曉諭先是

上諭內大臣蘇爾達公福善索額圖大學士阿蘭泰尚

書馬齊等擬招撫噶爾丹勅文奏覽至是大學士

阿蘭泰撰

勅呈

覽

上裁定之

諭大學士阿蘭泰曰著將此勅文發至京城兼書滿洲蒙古字以榜紙單書蒙古字使內府良工刊刻刷印三百張與勅書一併馳驛齎來以勅書及刷

印蒙古文俱交去員令將勅書授噶爾丹刷印蒙
古文逢人頒示

諭噶爾丹丹濟喇等曰朕統馭寰區中外一體效順
者必撫綏以生之梗化者必誅勦而滅之爾于烏
闌布通雖大敗逃遁朕仍欲與爾期約定喀爾喀
之事幾經發勅遣使爾等背誓掠納木扎爾陀音
直犯克魯倫朕乃親統六師遣使諭爾期會定約
爾狐疑不信不見我使朕抵克魯倫爾不能抗威

遁去遇我西師爾先逆戰至於大敗士卒死亡盡
棄馬馳牛羊子女廬帳諸物遁走衆寨桑台吉等
人絡繹來降丹濟喇格壘古英車陵奔遣其察罕
喀什哈亦來請降朕已面許之遣使歸去今朕躬
復統軍而出各處亦調兵為備爾等既失妻子馬
畜什物無衣無食窮困已極更無所之天時漸寒
死在旦夕朕不忍視爾屬衆妻子似儻寒凍而死
特降勅招撫爾等果悔前愆能來歸命朕不分異

同無不恭養俾得其所爾屬下衆人亦得見其妻
子各安其生朕斷不念爾等後作之孽倘猶迷而
不從試熟籌爾等長久之策有能收納汝等而活
之者乎爾等已無所歸各當來降朕必使爾等富
貴咸得其所毋疑毋懼特諭

命布克韜等赴大同宣化府監喂馬匹

上諭議政大臣曰大同府宣化府積貯草料甚多著於
坐用官馬之新滿洲護軍三百內使二百一十護

軍乘鹽池厰馬前去九十護軍携其所乘官馬九百匹往大同喂養其不乘官馬大臣侍衛官員之馬各照定例亦携往大同府喂養解此項喂養馬匹之時令三旗大臣每旗各一員侍衛各三員前去其在前兩隊之兵亦發往大同府喂養馬匹如此則不悞軍行而於事大有裨益爾等可會議來奏隨議將三百新滿洲護軍所乘九百官馬九十親隨護軍所乘三百六十馬帶往大同府喂養

除部院大臣官員之馬不喂外其不乘官馬之
大臣侍衛官員之馬照定額亦帶往大同府喂
養所喂馬匹俱交待郎多奇小心監喂三旗大
臣每旗各派一員護軍叅領各一員侍衛各三
員亦發往大同府監喂其在前兩隊之兵亦發
往大同府會同監喂人之口糧馬之草料俱照
去年例支給奏入

上命布克韜蘇永祚唐保住前往監喂餘如議

命以哈灘巴圖爾滾占解京馬駝給右衛兵丁先是
大將軍伯費揚古奏言右衛官兵到家未久調
兵文書又於九月初一日到初二日即起行而
來此項官兵歸未久而來甚速乞將哈灘巴圖
爾滾占所有馬駝停其解京給右衛八旗兵為
用

上曰前次大將軍伯費揚古存留馬匹原令解京今費
揚古請停解此馬分給其軍著該部作速議奏至

是兵部奏大將軍伯費揚古既稱此項馬駝請
俾解京給右衛兵丁乘用應准所請給右衛兵
俟兵歸日以馬匹數目報部前遣司官往迎此
項馬駝應發文追回仍檄知大將軍伯費揚古
可也

上命依議速行

甲戌

命以大同宣府等處所喂駱駝交侍郎多奇監喂行

兵部奏據大將軍伯費揚古咨准西路運米正
卿辛保等移稱前大將軍發解喀倫駱駝共一
百九十四頭除倒斃外現剩八十六頭已解右
衛今青草將盡之時此項駱駝應交何處伏乞
指示此皆大同宣化府等處地方喂養之駱駝
應貴部撥人收取作何喂養何處安置請賜裁
奪查目下侍郎多奇已往大同喂馬此項發往
右衛官駱駝八十六頭如到右衛應扣數撥發

官兵解至大同交待郎多奇喂養以此檄右衛
副都統正卿辛保併檄知大將軍

上從之

乙亥

命以諭噶爾丹

勅文及所印蒙古文發往大將軍伯費揚古軍前時
奉

皇上手定勅文書於龍箋又刷印三百張大學士伊桑

阿啟

皇太子送至

行在

上諭大學士阿蘭泰等曰著以此勅併蒙古文今即撥
善馳材能司官筆帖式送往將軍費揚古所差人
賚去其勅授噶爾丹其蒙古文令彼逢人各給一
張

命備儀仗音樂於歸化城

上諭內大臣福善等曰此行儀仗音樂俱未携來既往歸化城駐蹕如厄魯特蒙古來降無儀仗音樂似失觀瞻著取儀仗音樂俱裝載驛車併鼓手前來如排列儀仗大同軍士歸化城軍士執之

丙子主事巴什納奏報副都統祖良璧與厄魯特戰于翁金之地巴什納報西安正白旗蒙古旗分布達佐領下披甲祁台布爾哈圖于九月十八日到寧夏報稱副都統祖良璧張叅將等

率滿洲綠旗兵在翁金守米因天時寒冷軍士
難以久屯馬匹凍斃者多副都統祖良璧等遂
以現存之米分給兵丁餘皆焚燬前鋒當前輜
重居中副都統等親身殿後九月初六日自翁
金起程行五六里忽有蒙古五六人闌入我軍
輜重行劫我軍前鋒遂至西方山谷中忽有蒙
古兵自谷中大呼而出發烏鎗弓矢來逐我前
鋒及於輜重防護之兵與之接戰又入副都統

陣中相與混戰因路被阻截難以復回我等欲
來報信同董總兵趕馬之人迭乘所趕馬三十
餘匹而出蒙古見之以五十餘人追我等一日
一夜我等棄疲馬換好馬始得脫出至兩狼山
因馬已疲故留下正白旗蘇巴代佐領下披甲
伊林住布達佐領下披甲伍寶鑲藍旗漢軍披
甲劉姓僅我二人選好馬乘之先來報知問披
甲祁台曰爾等脫出時見副都統否蒙古兵形

影大畧有幾何是噶爾丹之人否言蒙古兵自
谷中驟出掩襲我軍相與混戰我不能達副都
統所蒙古俱有鳥鎗弓矢亦有執長鎗者視其
形影大都千餘不及二千皆乘馬是否噶爾丹
之兵不得而知我軍大半無馬報至

上命抄此報發大將軍伯費揚古

命免宣化府三十六年錢糧

上諭戶部曰宣化府錢糧曾已屢次蠲免但此數年該

地方各州縣飼養軍中馬匹大兵往來經行各項需用雖俱動正項錢糧而供應甚繁人民勞苦朕巡察至此見之中心不勝軫念著將康熙三十六年宣化府地丁銀米盡行蠲免檄該撫通行曉諭俾小民均沾實惠以副朕愛卹黎民至意爾部即遵諭行

上又諭曰將此上傳令即交知府諭衆通知

命黑龍江將軍薩卜素留歸化城養病薩卜素奏

臣

自科圖起程向張家口南行八百餘里九月初十日奉到兵部檄令臣速赴大將軍軍前是日即起程疾行又行八百餘里於十九日到歸化城歸化城距大將軍所駐西白圖地方千有餘里但臣居科圖時舊疾復作而又急行病勢漸增頭目旋暈左邊手足麻木不能長乘鞍馬但竭力趲行而已

上曰將軍薩卜素舊疾復作著賚奏筆帖式安泰今即

連夜儘力速往追回將軍住歸化城養病候駕

丁丑大將軍伯費揚古奏報副都統祖良璧擊
敗厄魯特於翁金之地費揚古奏副都統祖良
璧報稱職於九月初六日率八旗滿洲漢軍綠
旗官兵擊敗厄魯特自翁金起行矣本月十八
日遇理藩院撥什庫阿孫於哈爾哈納阿克達
地方發此文報知據此將前次來報之人阿蘭
泰張正宗拿禁謹具奏

聞

上以示議政大臣且

諭內大臣蘇爾達福善索額圖明珠大學士阿蘭泰
尚書馬齊曰前以祖良璧被厄魯特掩劫米糧什
物朕甚憂之噶爾丹為我軍所擊敗但存坐馬衣
服奔逃而出食盡衣單漸及寒凍勢在必亡雖獲
米糧什物能度幾日有何大濟第目下丹濟喇請
降而又劫米彼既得糧食其降尚少遲朕深憂之

今將軍費揚古報祖良璧擊敗厄魯特朕甚喜悅
噶爾丹今已困極雖不進討亦必滅亡今但以招
撫為要是以朕諭大將軍頻遣噶爾丹下人往招
之頻遣其人往招則噶爾丹雖不降下人必散自
來歸降

諭大將軍費揚古勅曰朕覽爾報知副都統祖良璧
擊敗厄魯特不勝欣慰此軍克之固不必言即或
不克噶爾丹一無所獲舍散之外更有何法爾將

軍但以招撫為要使之散盡勅文及招撫事件已
令本什等傳致不必更及但好言誘入我掌握中
當另畫一策特諭

命皇太子以副都統祖良璧擊敗厄魯特于翁金之
事諭將軍孫思克博濟

諭皇太子曰朕來時曾以祖良璧之事語將軍孫思
克博濟矣今祖良璧以擊敗厄魯特具奏此事到
後即抄一紙遣兵部司官一員賚示孫思克博濟

尋孫思克博濟覆奏曰

皇上真聖人也於臨行時即揣知此事

命臣等聽捷音今不出

聖上所料臣等何人乃遣章京來諭臣等臣等惟有踴

躍歡忭於無盡而已今

御駕親出必擒噶爾丹而斬之或迎降於

皇上馬前也

命川陝總督吳赫駐白塔偵探副都統阿蘭泰駐寧

夏防守先是吳赫奏言據披甲祁泰報稱副都統
祖良璧等自翁金起行而來忽有蒙古五六人
闌入搶奪輜重我前鋒逐至西邊山谷有蒙古
一枝自谷中大呼而出薄我前鋒近至輜重我
防護輜重軍士與之接戰又入副都統陣中相
與混戰我等因路阻截難以復回故前來報信
竊思噶爾丹乃極狡詐之人被

皇上天威奮擊失其巢穴食盡困窮躑躅游行希圖劫

掠未必不聞翁金有米來覓度命之策是以傳
令提督李林隆及衆總兵官防守邊塞臣身親
率兵二千出邊趨白塔倘有機會隨宜行事又
副都統阿蘭泰奏言臣身親往協助祖良璧

上命議政大臣集議至是議曰大將軍伯費揚古疏稱
副都統祖良璧率八旗滿漢綠旗兵九月初六
日擊敗厄魯特自翁金起行今總督吳赫又稱
率兵前赴白塔應令暫駐白塔偵探令副都統

阿蘭泰不必出兵駐寧夏防守檄總督吳赫提督李林隆副都統阿蘭泰知之至披甲祁泰布爾哈圖遇敵不戰探信不真輒自奔遁大千軍紀應交副都統阿蘭泰拿禁

上依議著速行

命遣侍郎阿爾拜以右衛兵丁馬匹分喂大同附近州縣

上諭大學士阿蘭泰尚書馬齊曰前令右衛兵丁馬匹

分喂大同宣化兩處右衛近大同將馬遠解宣化
不若在大同喂養爾等速議具奏隨議右衛兵丁
馬匹停其解至宣化令全解大同交待郎多奇

監餵

上曰餵養此項馬匹若在大同一處喂養苦累小民著
侍郎阿爾拜前去與監餵內大臣閱視分喂附近
州縣不得累民公平給價

戊寅

命賞宣化府張家口綠旗兵宣化府騎兵一百名張家口步兵一百名

上每人賜銀

諭曰此銀可留爾等家中日用俟到張家口給米下營者可近御駕駐扎不時賞給爾等

是行凡內外朝貢諸王貝勒貝子台吉官員部落男婦人等皆

賜金幣裘帽無虛日

己卯

總督吳赫奏報副都統祖良璧等擊敗厄魯特
吳赫奏言前以披甲祁泰等來報副都統祖良
璧等率兵而歸突遇蒙古賊人出截與之混戰
臣一面奏

聞即率官兵起行急到邊外哨馬營地方遇臣前遣
哨探把總傅益隆差兵丁田貴迎報云副都統
祖良璧叅將張憲載等率官兵掩擊蒙古賊人

大克之乃率官兵而還臣等仍往迎祖良璧覲
面問明另行奏報

喀爾喀多羅貝勒根敦帶青貢使至尚書班第
奏言本年九月二十二日喀爾喀多羅貝勒根

敦額爾克帶青之青寨桑來至臣所言去歲噶

爾丹至巴顏烏闌我等被彼阻截住居色楞格
之布隆哈地方噶爾丹遣二十人往烏郎海征
賦止而殺之續有噶爾丹下阿海納青等十人

逃來又殺之又有噶爾丹下圖卜申寨桑之子
安達爾轄等六十戶烏郎海額爾德尼轄等六
十戶烏郎海額爾德尼轄達魯哈塞濟木多爾
通格等百戶俱降之本年七月間我哨探之人
於杭愛山陰額什根頹嶺擒額魯奇十二人彼
言噶爾丹被大兵擊敗率三十人而逃從庫克
納塔爾哈趨杭愛山噶爾丹下人離散者追而
及之與之復會丹濟喇丹津俄木布等台吉之

兵與噶爾丹兵共千有餘人至阿喇卜灘之兵
千許伊等僅有本身所乘馬駝更無多餘馬駝
牽行其牛羊糧食住房全無其內自相竊奪馬
駝為食又丹津俄木布納馬什希諾顏阿喇卜
灘與噶爾丹不睦阿喇卜灘踰杭愛山從俄羅
海西喇烏素向西而去丹津俄木布納馬什希
諾顏亦防噶爾丹分途相避而行噶爾丹率其
黨羽踰杭愛山由庫冷白兒齊爾趨塔米爾塞

欽向正西而去我十二人皆阿喇卜灘之人因
無糧食欲捕獸而至此于是始聞噶爾丹之敗
斬所擒十二人是以差楚楊和碩齊等四人往
克木祁木齊克等處問烏郎海人探噶爾丹情
形去向聲息差我等請

皇上安併奏原由且令來告尚書我等來時我貝勒挈
裝自塞稜格向博羅罕而來據此遣青寨桑吳
勒木濟乘驛往奏青寨桑等口奏曰聞

皇上親統大軍滅噶爾丹我貝勒向內而來但欲立功
擒噶爾丹有精兵千餘但馬畧少今貝勒遣我
等來貢請

安

上諭皇太子曰朕躬安好此行較前不同諸物豐盈天
時頗佳每日愉快以行聞塞外今年暄燠問馬習
言沿路水草並佳野多兔山間有獸殆可遣懷每
年進獻

皇太后禮物汝於初三日親身詣送朕亦續遣太監賚進
途中所有數種物也此書書畢適根敦帶青貝勒
書至來人云聞皇上親統大兵勦滅噶爾丹我貝
勒領兵前赴惟祈擒獲噶爾丹以立功勞有精兵
千餘但馬畧少耳茲併以尚書班第書發往

庚辰

命根敦帶青乘時勦滅噶爾丹

上諭議政大臣曰根敦帶青久無音耗朕甚念之今根

敦帶青將噶爾丹下人亦招降六十餘戶殺四十餘人又招降噶爾丹徵賦之烏郎海人一百六十戶遣使來奏噶爾丹為我軍所擊敗兼之祖良璧兵又擊敗之根敦帶青又在意外勦撫噶爾丹之人則噶爾丹之滅速矣今事已竣朕心大慰卿等亦必喜悅也併明諭來使著根敦帶青如有勦滅噶爾丹機會當預備勦滅之如擒獲噶爾丹勿得生獻即在爾地立決尋議政大臣奏多羅貝勒根

敦額爾克帶青前既避噶爾丹與之分居噶爾丹敗後又四處堵禦勦撫其衆又遷至博隆哈地方陳奏原由殊為可嘉請將今年五月內

皇上親統六師抵克魯倫河噶爾丹不能抗拒

天威即棄其子女逃遁適遇大將軍伯費揚古之兵遮其西路一戰大敗盡棄其妻子廬帳駱駝牛羊等物孑身遁出大殺厄魯特併殺阿奴丹巴哈什哈察罕西達爾哈什哈等寨桑厄魯特二千

餘人來降丹濟喇遣使說噶爾丹歸降厄魯特
男婦來降絡繹不絕噶爾丹無衣無食窮困已

極

皇上現統大兵親出塞外大將軍伯費揚古又率大兵
進討噶爾丹各項情事該部備文檄知多羅貝
勒根敦額爾克帶青至噶爾丹目下無衣無食
四向無歸困窮已極應令主事諾爾布鄉導索
諾木及根敦帶青使人青寨桑吳勒木濟楚雅

哈等乘驛速往蒿齊特邊哨自邊哨以外擇馬
乘坐給之糗糧從

御駕前行之路西蒿齊特邊哨釵達木哈喇俄博由伊
克扎喇之西過俄羅壘由呼巴海阿爾噶賴之
東抄過伊扎爾額爾奇納克踰阿爾噶蘇台嶺
到特勒爾濟口自特勒爾濟口以外之路青寨
桑吳勒木濟等識之即令吳勒木濟等指引星
速送文交根敦帶青仍令多羅貝勒根敦帶青

乘噶爾丹窮迫之際整飭軍士勦滅噶爾丹可也奏入

上命檄知大將軍伯費揚古餘如議

命查給根敦帶青俸

上諭尚書馬齊等曰著查喀爾喀多羅貝勒根敦帶青俸祿再取裘帽十三副交郎中滿都員外拉都渾管張家口驛站員外黑色收貯留根敦帶青現到使人青寨桑夥伴博垂俟後來貿易之十三人到

後以此裘帽分給所獻大鹿角諸物令滿都等受而藏之其貨物令滿都等親交八家商人代彼貿易諸貨俱照時價從多估賣及賣後所買貨物俱照時價畧減估買遣回之時撥理藩院撥什庫同賞根敦帶青俸銀務令送到此撥什庫歸時仍於根敦帶青人來之便設法同來

辛巳

駕出張家口駐蹕察罕拖羅海大將軍伯費揚古報

丹濟喇敗于翁金聲息費揚古奏康熙三十五年九月二十日厄魯特降人名阿玉什者來言我自伊扎爾布都納隨丹濟喇往趨翁金貯米之地本月初六日早見翁金兵起行我等藏匿俟其少過丹濟喇率我厄魯特往攻欲奪其行裝馬匹而輜重後殿兵發鎗礮接戰輜重前導兵又返而夾擊之我厄魯特敗向西而走次日晚我自下營處逃來據此將厄魯特降人阿玉

什交筆帖式詹住往奏

上復命問阿玉什據云往奪米時丹濟喇原以為不可
衆小人言聞翁金現有米與其餓死何不取以
為食遂往行一日程我厄魯特哨卒執喀爾喀
三人于是潛伏一小山俟歸來大兵稍過當中
截入護米之兵不及披甲鳴角首尾夾擊發礮
四次我等遂走我出逃之路見厄魯特死者十
餘人不知其他又問我軍得傷否據云丹濟喇

傳令原云逢人勿殺但取米與行裝今不但殺人我厄魯特反失馬無筭丹濟喇出大悔曰欲向清水捕魚徒攪水渾而不得魚今奈何甚為懊恨因馬臆落盡步行者多在我後來者甚多為此奏報

壬午

上諭皇太子曰撫遠大將軍領侍衛內大臣伯移咨理藩院為知會事康熙三十五年九月二十日未時

厄魯特之人阿玉什來投順云我自阿濟爾布都
納隨丹濟喇回至翁金貯米地方於本月初六日
早見翁金之兵起營我等在傍潛伏俟其絡繹前
行丹濟喇率衆衝突欲搶馬馳行李其殿後大兵
隨放礮銃拒戰在行李之前兵馬亦回顧夾攻我
厄魯特敗遁而西次日天晚下營我遂逃奔前來
等語其投順之阿玉什乘汝衙門筆帖式詹住回
京之便將此文並人於二十八日晚間到問阿玉

什對云此番搶米非丹濟喇本意衆人言翁金現有米與其餓死不如取而食之於是前往行及一程遇我哨兵搶喀爾喀三人遂隱伏山坡待我兵迤邐前行從中衝截守米之兵不及甲冑鳴笳首尾夾攻礮擊四次隨即敗遁彼一路見有厄魯特死者十餘人別無所見又問我兵曾失利乎彼云丹濟喇曾傳勿殺人止搶米之令今勿言殺人并厄魯特之馬反損失多矣丹濟喇脫身後甚是怨

悔惟思清水捕魚水雖已渾魚終不得將如之何
氣忿至極其馬俱羸弱徒步者衆在我之後接踵
而來者甚多先示大略俟有報至再傳諭

川陝總督吳赫奏報祖良璧擊敗厄魯特之事

吳赫奏言臣于九月二十三日至石嘴子地方

見副都統祖良璧叅將張憲載問之據言我等
翁金看守之米所餘無幾再畧待之則兵丁歸
途糧食不敷是以盡將餘米捆載于九月初六

日起行頃之前導署前鋒章京屯住虎遇蒙古賊人八人來奪行裝即同千總劉進孝率綠旗兵三十名往逐之故遣人來報我乃親率官兵往迎行不數里突有厄魯特賊人二千來截我急令滿漢軍綠旗兵發鎗矢奮勇殺入賊分兩隊圍我于中我親率官兵從東方殺出重整官兵排列子母礮鳥鎗令僕從俱執鎗棍併力進戰自卯至巳拒敵良久仰仗

天威賊人大敗向西北遁走追二十餘里因山谷險峻
不便深入于是退歸陣斬蒙古賊人百餘我軍
糧米什物並未嘗被賊劫去其知縣佟世典守
備王佩等運到哈爾哈納阿達白塔米一千石
俱已焚燬奏至

上命議政大臣集議隨議副都統祖良璧率領官兵擊
敗厄魯特蒙古九月二十七日可到寧夏應檄
知大將軍伯費揚古其哈爾哈納阿達白塔所

貯之米既已焚燬無庸議

上從之

命罷右衛兵前進

上諭內大臣蘇爾達等據厄魯特降人言噶爾丹往博羅烏納罕空音扎巴哈等處地方度冬令丹濟喇至博羅烏納罕就之所云博羅烏納罕者乃扎薩克圖汗舊居之地問其所在距喀倫有四十餘日之程大將軍伯費揚古進兵之時右衛兵每人乘

馬一匹以驢騾負裝其臆亦瘦云朕料斷不能到
噶爾丹所在之地必自翁金等處因馬瘦而還如
到翁金始退則兵徒勞而無益于事朕所以使大
同餵馬者正欲探實噶爾丹所在如立刻可行則
于黑龍江六百兵內選前鋒二百新滿洲四百察
哈爾兵一千整備鎗礮全用肥健馬馳充足米糧
進勦乘其窮困可一舉立滅之噶爾丹業已盡破
今我軍何故不深筭勦滅之策而徒勞人馬乎今

速檄大將軍伯費揚古不必進兵如有決然可取之機則勿停止噶爾丹已窮極而無所歸矣倘今冬不可行至來年青草萌時肥秣馬駝以備視噶爾丹所往務期追覓勦而除之此際頻遣厄魯特降人招撫為要使彼降盡爾等其集議以聞議曰勦噶爾丹而滅之及招之散之之策

皇上皆已詳畫

諭旨誠是俱應欽遵

上諭而行請速檄大將軍伯費揚古奉

旨行事仍著作速回奏

上命如議速行

癸未

上駐蹕海柳圖

命調俄爾多斯兵

上諭尚書班第曰爾可往歸化城遣人于俄爾多斯旗
分因俄爾多斯左翼三旗近歸化城令于三旗內

調兵二百至黃河對岸伺候如俄爾多斯王貝勒
貝子公台吉有來請安已過河者令赴歸化城來
如未渡河則與所調兵同在對岸候駕

理藩院筆帖式海壽奏報遷移喀爾喀扎薩克
台吉阿里雅等戶口之事先是筆帖式海壽奉
差往遷喀爾喀台吉阿里雅阿爾薩闌衛寨桑
等戶口至是海壽奏言喀爾喀扎薩克台吉阿
里雅阿爾薩闌衛寨桑等戶口及同居游牧之

喀爾喀多羅貝勒汪扎爾屬下巴爾虎二百餘
戶公西卜退哈灘巴圖爾旗下多爾濟青台吉
二十許戶俱遷來歸併于達里岡阿地方喀爾
喀扎薩克台吉車陵扎卜所居安插扎薩克台
吉阿里雅旗下無力者二十許戶俱留克魯倫
地方俟雪消後阿里雅遣人遷來

上命議政大臣集議隨議喀爾喀扎薩克台吉車陵扎
卜奏請安插有樹木地方已准與扎薩克台吉

阿里雅阿爾薩闌衛寨桑多爾濟青台吉車陵
扎卜住居一處就水草佳地遠設哨卒西探聲
息小心防範貝勒汪扎爾屬下巴爾虎等既與
阿里雅等同居游牧應仍令暫與阿里雅等一
處安插俟來年貝勒汪扎爾祖母波底蘇克使
人到後問明再議阿里雅旗下無力者二十許
戶既稱俟雪消後阿里雅遷來應無庸議奏入
上從之

聖祖仁皇帝親征平定朔漠方略卷三十

欽定四庫全書

聖祖仁皇帝親征平定朔漠方略卷三十一

十月甲申朔

命加恩大將軍伯費揚古軍士

上諭尚書馬齊曰大將軍費揚古所領軍士甚為勞苦
食用必致缺乏欲將朕所用牲口發去道路遙遠
牲畜既瘠瘦且須時日可遣人往尚書班第處取
殺虎口大同等處現存銀五千兩遣官一員送至

大將軍費揚古所酌買皮裘牛羊等物給與軍士
上閱牛羊羣

賜諸王大臣官員食畢使喀爾喀多羅郡王塞稜阿
海台吉阿里雅阿爾薩郎衛代青及厄魯特降
人射

上率諸皇子射

上連中五矢諸皇子皆屢中喀爾喀諸王及蒙古諸王
台吉厄魯特降人無不驚服

上問塞稜阿海王等喀爾喀厄魯特交戰之由

顧諸王大臣曰今日喀爾喀厄魯特皆在朕直論其事彼皆向來貢獻本朝之國兩國交惡其曲不在厄魯特而皆在喀爾喀喀爾喀先犯厄魯特喀爾喀理曲是以其國為厄魯特所破但厄魯特借伐喀爾喀為名進我境內烏闌布通之地為我師所擊敗已立誓不復侵喀爾喀矣今又背誓入犯我邊汛屯於克魯倫之地則厄魯特理曲是以朕親

統六師滅之天道昭然毫釐不爽朕為天下萬國之主寧有偏徇之理乎朕所以破厄魯特者非為喀爾喀也喀爾喀王塞稜阿海及厄魯特降人沙克朱木等皆跪而奏曰此等曲直臣等向愚昧不知今蒙

皇上申明大義兩國致敗之由方得曉然此實我等之所自取也諸大臣奏曰

聖諭精詳誠為至論兩國之人俱傾心悅服矣

丙戌

駕至胡虎額爾奇

命大將軍伯費揚古駐劄喀倫收厄魯特降人先是
厄魯特降人言噶爾丹往博羅烏納罕奎金札
巴干等處度冬語丹濟拉爾可至博羅烏納罕
覓我云

上於是

諭議政諸臣曰大將軍伯費揚古進兵矣聞右衛兵

每人乘馬一匹負行李於驢騾而往其臆亦瘦云
朕料其斷不能到噶爾丹所在必自翁金謂馬瘦
而回兵徒勞而無益於事朕秣馬於大同者特欲
驗實噶爾丹所在如目前有可行機會則於黑龍
江六百兵中選前鋒二百新滿洲四百察哈爾部
落兵一千整齊鎗砲令備肥馬駝可一舉勦滅之
噶爾丹已破盡今我何故不深為勦滅之之計而
空勞軍馬乎今速檄大將軍伯費揚古止其進兵

至是大將軍伯費揚古奏言官兵馬瘦已回喀
倫

上交議政諸臣議隨議大將軍伯費揚古因馬瘦回喀
倫候

旨皆如

上諭矣現今大將軍回居喀倫應檄費揚古給右衛兵
到歸化城之米自歸化城支米歸右衛其餘之
米給黑龍江官兵

欽定四庫全書

平定叛漢方略

卷三十一

四

御賜銀五千兩大將軍可酌備皮裘乾糧等物分給官
兵駐扎喀倫附近地方暫俟差往丹濟拉處使
人津巴歸併收厄魯特降人

上准行止令護軍統領瓦爾達留大將軍軍前

副都統祖良璧奏

聞翁金破賊情形祖良璧奏曰臣率正黃旗滿洲叅
領賽必漢正藍旗漢軍叅領李枝聯官兵五百
名及護米漢軍叅將張憲載遊擊陳維屏等官

兵五百名在翁金地方守護米糧因不知大兵
回否信息於九月初一日集諸臣商議翁金地
方所有米石無多若在此久待衆兵所携之米
不足食回寧夏因於九月初六日回師是日早
啟行據正白旗署前鋒叅領敦朱祐遣鑲黃旗
前鋒護軍校和尚報稱蒙古賊八人來奪行李
敦朱祐同千總劉進孝領官兵追逐而去臣一
面遣正藍旗署叅領馬朝龍撥滿洲漢軍官兵

六十名叅將張憲載領兵四十名速行偵探來報臣即率滿洲漢軍隨後而進行不數里與千餘賊相遇臣親率賽必漢李枝聯所領滿洲漢軍官兵併張憲載所轄漢軍官兵排列烏鎗官兵奮勇前進蒙古賊兵分為兩路圍逼臣等臣等率領官兵從東殺出見賊分頭搶奪行李臣即整齊士卒用把總吳進所携子母礮二門併鎗手廝卒排列成陣各執長鎗木棍合力前進

自卯至巳放鳥鎗三四十次連發十餘矢仰仗
天威大敗蒙古賊兵斬殺厄魯特百餘人賊向西北而
遁臣同叅將張憲載領漢軍官兵追殺二十餘
里此皆

皇上天威遠播蒙古賊兵魂魄俱喪故能致此大捷但
蒙古賊兵狡猾而翁金地方山險谷深不可深
入故不窮追收兵而回於本月二十七日已抵
寧夏謹繕疏以

聞

上曰祖良壁於翁金地方守護糗糧回師之時遇賊千人忽來侵犯率領滿漢官兵擊敗厄魯特斬殺百餘人據厄魯特降人言我官兵奮勇直前大敗丹濟拉創鉅痛深官兵効力可嘉在事有功人員著分別議叙具奏

上諭皇太子曰欽天監官員前因步軍初放排鎗即奏稱天鼓響自西北適朕所遣之人回奏情由彼頗

惶懼叩首懇求將疏持回又一次奏稱日午地動
朕謂舉國之人何無一覺者若輩辭窮奏云惟臺
上覺動朕亦姑容之在監人員類皆怪異妄誕微
末小人朕躬在外恐搖惑人心捏造訛言亦未可
定若衆人皆知即屬實事若舉國不知殊有關係
不可不詳為留意值更太監亦屬微末欽天監既
經奏聞彼自附會其說值更之處甚多不宜止以
太監之言為憑也

上諭皇太子曰朕於二十九日度察罕拖羅會嶺駐蹕於喀喇巴爾哈孫之地是日閱鑲黃旗牛羣其數至一萬六千頭毛色甚佳三十日駐蹕於昂古里湖地是日閱右翼達卜孫腦爾之馬羣其數至二萬匹整齊肥壯不可言喻初一日駐蹕於俄羅斯布拉克之地是日閱正黃旗牛羣其數一萬六千頭羊七萬隻蒙古王等以下喀爾喀厄魯特之人咸以為竒云自我祖宗以至於今但有牛一二千

頭遂稱極富從來未聞有至萬頭者今見馬匹無
論大小盡皆肥壯光澤羊隻甚肥曩時亦曾聞朝
廷之牧畜蕃多或以為告者太過未之深信今日
擊如此始知我皇上諸福駢集羣相驚異贊頌向
來聞張家口外甚寒自今觀之頗覺和暖河亦未
凍或一處始有薄冰草雖黃而草根尚有青色夜
間帳幕中不必燃火人服綿衣皮褂者甚多聞他
年亦不如此較之哨鹿之地甚為溫暖朕行蒙古

地方多矣似此佳處未之見也此皆

聖祖太宗皇帝幸歸化城時所指之地遺於子孫收園日
增孳息日盛也宜哉圍獵時觀之兔雖不甚多亦
不稀少地極平坦可以此奏

皇太后知之阿爾薩闌衛寨桑以其幼主阿里牙來今令
赴京師亦與車林查布一體恩視學士拉西識其
人可令彼通譯車卜登貝勒之母亦詣朕前令其
赴京此人

皇太后亦知之可令進見

丁亥

上駐蹕昭哈停古北口兵丁拴養駱駝行兵部奏言古
北口總兵官馬進良疏稱臣標出征兵丁原領
駱駝六百三十三頭內三百三十三頭倒斃及
回到邊口又倒斃一百五十一頭等語此項駱
駝乃動支朋銀買備數不可缺應檄直撫及該
鎮令彼屬官從容陸續補足備用奏准在案今

該鎮既稱邊口地方于駱駝不宜請停餵養應
停止古北口兵丁拴養駱駝現存一百四十九
頭發至宣化交侍郎席米圖餵養倘有調用取
而用之倘無調用俟撤回宣府所餵馬匹之時
將此項駱駝取至京城分給八旗拴養停其買
補著將原價照數陸續交付該撫存貯

上從之

戊子

上駐蹕河約爾諾爾

遣阿旺丹津赴大將軍伯費揚古軍前

上諭議政諸臣曰今招撫伊喇古克三庫圖克圖使其
徒阿旺丹津前往阿旺丹津到大將軍伯費揚古
處後著於前此張家口願往八員內撤三四人同
阿旺丹津遲七八日後行如前此遣往之人已皆
起行無可同遣之人即將阿旺丹津暫留大將軍
處此後有當遣人機會再同遣往爾等可使撥什

庫一名送阿旺丹津至將軍費揚古處

庚寅

駕自巴倫郭爾啟行見沿途隨行商賈人等遇河徒涉
思河水已寒乃

命疊乘侍衛之馬以渡之

駐蹕胡魯蘇台

命以大兵馬馳交待郎多奇監養大將軍伯費揚古
奏曰臣軍中有右衛兵二千五百黑龍江兵五

百共三千今噶爾丹已遠遁博羅烏納罕空金
札巴干等處請遣回右衛兵一千養馬如有取
用再往調發至宣大所餽西路兵之馬駝內瘡
瘦者原交喀爾喀部長台吉額爾德尼哈灘巴
圖爾滾占因聞報見厄魯特形踪遂以馬八百
給右衛兵乘坐給駱駝一百二十頭馱載行李
此內所餘瘡瘠馬七十三匹駱駝三十九頭交
存達爾漢親王諾內處俟來年肥時聽該部收

取其兵丁處撥馬八百匹駱駝一百二十頭小
心趕護進德勝口解至大同發與監牧大臣餵
養

上命著將馬駝檄監牧侍郎多奇收領小心餵養

厄魯特札木素白奇等被擄為奴

上以銀各三十兩

賜其主皆贖之先是大將軍伯費揚古兵大敗噶爾
丹於昭莫多之地斬噶爾丹之妻阿奴寨桑台

吉厄魯特等二千餘生擒一百許子女三千許
此所俘獲皆各給擒獲之主至是

上賜銀贖出俱使得所嗣是以後有若此者無不贖還

甲午

上駐驛喀喇河朔

命以歸化城米備給兵丁撤腰站遣察哈爾新滿洲

更替黑龍江兵

上諭大學士阿蘭泰尚書馬齊等曰今年歸化城一帶

豐收價賤俟到歸化城後扈從人員應支十日口糧可折價給發令彼自買歸化城所貯之米乃為兵備之也此米有餘則右衛兵出行順便給散大有裨益到歸化城後自張家口起至歸化城止除常設驛站外其增設腰站俱撤去以兵部隨行之馬設腰站至殺虎口止又黑龍江兵出師日久據將軍疏言僅有食米可至十一月初五日俟到歸化城後應以察哈爾兵五百新滿洲一百足給馬

匹糗糧遣往更替

遣歸化城兵丁酌撥羸馬往大同右衛等處餵養

上諭議政諸臣云兵丁僅十日不支糧猶可如多住日
久不支口糧可乎况歸化城四圍草少著將浮多
無事之人酌發羸馬至大同右衛等處餵養伺候
或當遣黑龍江百名之兵或留此兵將新滿洲兵
內發往著會議來奏議曰歸化城四圍草少若使
浮多無事之人發羸馬至大同右衛等處餵養

伺候甚有裨益其侍衛護軍俱扣數帶來不遣
行外應於八旗二十四員護軍叅領內撥九員
內務府各色執事人員內撥三十六人牽駱駝
之披甲內撥四十人伊等馬匹羸瘦俱當發往
取土默特披甲代牽駱駝此項發往餵馬者共
九十四人其乘來官馬取臙大者存之以留居
人等瘦馬換發遣至大同監牧三旗內大臣所
查照前額支草料餵養如有額外浮冒支領者

查出嚴加治罪留居此地大臣侍衛護軍披甲
職事人員之馬視歸化城四圍好草之地牧放
其黑龍江將軍薩卜素帶來百名之兵著令往
右衛餵馬

上曰此發往人員臆大之馬不必調換盡著發去其留
居人員之馬著內府總管上駟院總管太僕寺同
驗馬臆將臆瘦馬匹亦發往餵養此發往馬缺撥
馬補給薩卜素發往兵丁馬匹著薩卜素申飭屬

下官員監視至趕解馬匹則撥新滿洲護軍三十名併帶其本身坐馬往薩卜素兵丁餵馬處著前去官九員監視令侍郎亦巡行查視至牽駱駝則取土默特兵中能步行貧人步牽之給伊等飯食餘如所議

乙未

嚴禁僕從及土默特蒙古

上諭內大臣曰明日到歸化城停止圍獵著大臣侍衛

俱鮮明衣服肥馬垂纓又歸化城商賈叢集恐僕
從肆行搶奪併交副都統阿迪嚴禁恐土默特蒙
古盜我大臣侍衛執事人員兵丁馬匹著諭衆通
知

丙申

駕自白塔往歸化城大排鹵簿歸化城副都統阿迪等
率官兵來迎又老少男婦皆執香擁集路旁跪
接歸化城大喇嘛陀音庫圖克圖西勒圖庫圖

克圖率其下諸喇嘛排列幡旛手皆執香作樂
來迎

上入覽陀音庫圖克圖廟西勒圖庫圖克圖廟默爾根
綽爾濟喇嘛廟

諭內大臣曰廟中狹隘放入頂禮諸人地窄難容明日
視廟前左近墻地駐蹕大臣侍衛護軍兵丁執事
人員有願住房者聽之不之迫也著通行曉諭
以庫銀借給官兵購買馬駝

上諭尚書馬齊曰視歸化城馬馳甚多其價亦賤官員
侍衛兵丁有欲借銀販買馬馳者奏聞借給先是
騎官馬新滿洲不准借給今有借者亦准給與

丁酉

諭中西兩路酌議運米事宜先是于成龍等奉
旨兼程赴歸化城至白塔迎

駕

上諭曰爾等前次運米遲悞罪在不宥朕今許爾等効

力自贖其將爾等捐牲口幾何能運米幾何與西路運米諸臣一同酌議具奏于成龍等奏曰臣等幸蒙寬宥令効力自贖臣等雖捐糜頂踵不能圖報萬一目下王國昌等官員十人俱在大將軍軍前効力請發該部作速調來會議覆奏

上曰然著作速往調至是于成龍王國昌等會議奏云于成龍願備駱駝四十頭李鈞喀拜各願備駱駝三十頭王國昌喻成龍辛保范承烈各願備

駱駝二十五頭挽運

遣察哈爾官兵赴大將軍伯費揚古軍前効力

上諭察哈爾官兵曰爾衆察哈爾官兵並無俸糧而勤勞素著是以朕每有詔旨必云我察哈爾今遣爾等往聽大將軍指揮爾等到後其各努力自効旋師之日必使爾輩各得其所

給右衛陣亡官兵身價銀停扣官兵所借公庫銀

上諭大學士阿蘭泰曰右衛官兵屢次出征殊為勞苦
阿蘭泰爾可往查陣亡兵丁給身價銀停扣兵丁
所借公庫銀爾可携學士一員酌撥章京乘驛而
往到日集衆傳旨阿蘭泰請帶學士倭倫併請

諭旨奏曰倘有陣亡官乞併給身價銀至官員所借

銀兩及不出征人等所借銀兩亦請一槩停扣
上曰陣亡官兵僕從俱盡給身價銀至不出征官員兵
丁所借銀皆著停扣阿蘭泰等又奏曰聞陣亡者

之家口亦有回京者此應在京給與臣等不必再給給銀之時臣等親身一一驗給

上曰善

達賴喇嘛達賴汗使人入覲許之諦巴使人入覲不許

上諭議政諸臣曰伊什格隆來奏言達賴喇嘛使人聞駕臨此地前來迎接當令在歸化城十里外伺候著議政諸臣議奏議曰達賴喇嘛使人聞

駕臨此地前來迎接應令達賴喇嘛使人達賴汗使人
入見不應令諦巴使人入見

上從之著將軍薩卜素率善射甲士二十名扈從其餘
官員僕從馬馳皆發往右衛餵養所留披甲二十
名著併入三旗一百八十護軍內各附旗下有親
戚者而行

皇太子請赴

行在

皇太子奏曰今春百日有餘遠離

膝下茲又不獲望見

天顏者兩月有餘臣子慕戀之思誠難自解今內府所
有廐馬旗下馬兵部馬實皆肥好或召臣減
從而行

父皇若少待亦無所悞半月之內似儘可到也
聖心垂念准行

上曰所奏已悉皇太子不必前來

戊戌

上諭內大臣曰每日拴馬二三匹預備何為若朕明日
出則今晚傳使馬略得食午時

上出行宮左翼則科爾沁和碩達爾漢親王額駙班第
和碩土謝圖親王額駙沙津喀爾喀和碩親王
策旺札卜多羅郡王端多卜多爾濟內大臣科
爾沁一等台吉額爾黑圖等及陀音庫圖克圖
等厄魯特降人布爾扎等右翼則內大臣西勒

圖庫圖克圖達賴喇嘛使人剛占堪布丹巴囊
素達賴汗使人彭素克青海台吉札什等使人
喀木札木卜等及歸化城官員土默特官員黑
龍江官兵察哈爾官兵俱坐左右兩旁作樂飲
宴

己亥

使內大臣吳巴什等率察哈爾兵赴大將軍軍前
上諭議政諸臣曰近者將軍費揚古疏稱黑龍江官兵

支過五十日糧於九月初五日期滿故將喀倫所
有之米算至十一月初五日給與兩月之糧除截
留千石米外餘米俱賞給蒙古截留米千石已全
給與官兵喀倫地方無現存之米矣等語前者原
令將喀倫所有之米儘給兵丁再將所餘給七旗
蒙古兵今遽給之則為時太早而非策矣著以此
撥將軍費揚古知之茲發察哈爾兵五百使散秩
大臣吳巴什領之給兩箇月餼糧赴大將軍費揚

古軍前此兵到後著閱黑龍江兵內人強馬壯者
選百人留之其官員亦計兵額留之于解往銀五
千兩內酌量支取以給所留一百之兵准較察哈
爾兩月糧數亦給與兩箇月糧所餘兵著遣來再
遣叅將張文煥副以一章京至祖良壁處探問與
厄魯特如何征戰來奏

使協理台吉多爾濟思喀卜等同員外舍稜駐劄
哨探議政諸臣奏曰據員外舍稜報云職到安

王駐札之地即遣人前往躡探並無聲息踪跡
又據職同行蘇尼特多羅郡王薩木之子協理
台吉多爾濟思喀卜多羅貝勒博木布之子協
理台吉蘇代喀爾喀輔國公車木楚克納木札
兒衛徵諾顏阿玉什等告稱我等以為此行止
到土喇故兵丁之來僅帶八十日口糧併無冬
衣今兵丁既無冬衣口糧亦將完等語將伊等
或撤或留祈大部轉奏請

旨示知查厄魯特噶爾丹已無去路極窘之際探噶爾丹聲息者關係緊要且大將軍兵未撤則員外舍稜所在台吉兵丁不便遽撤應檄舍稜令將此兵各撥本旗內兵更替或遣內中兵歸取衣糧回留彼處探聽

上曰著多爾濟思喀卜蘇代車木楚克納木札兒衛徵諾顏阿玉什等本身於大將軍未撤兵之前與舍稜同駐探聽其他兵丁俱著歸去

賜執訊人尼兒察等白金理藩院奏曰部長一等台
吉車陵札卜阿里雅呈稱我尼兒察杜稜布達
胡兒齊羅卜張塞稜額勒兒代博克圖鄂克森
阿玉什張布等十一人往擒生口獲厄魯特兩
人至軍中獻之

御前解人兩人已賞銀各十兩其餘未往者俟回京時
再賞等語相應賞擒獲生口之尼兒察等十一
人每人銀各十兩

上從之

庚子

曉諭內大臣吳巴什

上諭吳巴什曰茲遣爾五百察哈爾兵赴大將軍伯費揚古軍前並無緊急之事爾等當緩行毋得勞馬爾到將軍軍中之後聽將軍指揮將軍以為好朕無以為醜之事若以為醜朕無以為好之事至爾人材亦居中下當令內大臣策旺諾爾布一等侍

衛鄂齊爾杜拉爾與爾偕往商酌行事此兩人皆得當可用之人勿以蒙古待之吳巴什等奏曰謹

識

皇上訓旨竭力而行又

諭吳巴什曰爾到彼處傳諭將軍言朕幸歸化城兵丁執事人員皆乘內廐之馬目下在大同肥秣馬匹如有急用當預先奏聞

辛丑

命將軍孫思克博濟率兵駐肅州會同副都統阿南
達相機勦滅噶爾丹阿南達奏曰臣領巴圖爾
額爾克濟農等兵前來或應遣回或留駐甘肅
等處如遣回則不必言矣如仍留之則喀爾喀
巴蘇特部長默爾根濟農一等台吉索木伊思
卜等七台吉巴圖爾額爾克濟農之子玉木楚
木等四台吉共二百五十名兵所帶兩個月口
糧已完乘來馬駝俱已疲瘦今草枯天凍若不

餒馬則有所行動不可用矣應將撥給口糧馬
駝草料之事煩貴部轉奏請

旨施行

上發議政諸臣議奏會議云噶爾丹窮困已極各處逃
竄應令阿南達巴圖爾濟農等率兵駐肅州不
時遣蒙古諸人探聽如有聲息遵前

旨勦滅著伊等給與兵丁口糧馬駝草料

上曰噶爾丹窘迫已極必亡命走哈密著撒孫思克率

其標兵赴肅州至阿南達處預備著將軍博濟於
西安兵內未行者選人材偉健之兵二千名亦赴
阿南達處會同孫思克探噶爾丹有往哈密城之
聲息即行勦滅併將朕自十九日出行以來為厄
魯特奏報之事俱騰出發至阿南達處使知情形
餘如所議

副都統阿南達奏報噶爾旦多爾濟肅州之約
阿南達奏坐探布隆吉爾得爾白兒濟灘納秦

諸路哨卒以噶爾旦多爾濟所設哨卒名拜格者解至臣處臣泛論之際謂拜格曰汝可往告汝噶爾旦多爾濟

聖上待汝比衆不同將撫育汝汝反逃去如此舉動是乎爾等並未作大孽奉

旨與巴圖爾額爾克濟農同居巴圖爾額爾克濟農擅去游牧爾等亦無知同行游牧其時爾年小不能禁止下人

聖上亦灼知之

聖上不過軫念爾祖窩齊爾圖車陳汗玉成汝而已故
到處之人皆尊待汝爾可以我此言往告噶爾
旦多爾濟後噶爾旦多爾濟亦差納木喀巴兒
喀木札巴等十人來告曰

皇上憐我祖我兄使與巴圖爾額爾克濟農接壤而居
予之牧地永享安樂因巴圖爾額爾克濟農擅
自游牧我等無知亦同往游牧及

皇上勅旨到日我年方幼我母一婦人不能回奏每思此情何以得達今祈侍衛將我奏事之人一同帶往可乎臣語之曰爾厄魯特之人不可信果欲遣使當於十月二十日務令使人到肅州既與之約乃遣之歸

上發議政諸臣議奏會議曰副都統阿南達既與噶爾旦多爾濟使人約十月二十日務到肅州應俟噶爾旦多爾濟奏章使人到日再議

上從之

壬寅

遣侍衛馬武以牛五十羊二百湯羊十迎

賜大將軍費揚古軍前右衛官兵

癸卯

副都統阿南達奏報各路備兵阿南達奏十月十四日接到理藩院咨文內稱阿南達所奏三

事奉

旨報聞著將噶爾丹窘迫情形備文發去使彼知噶爾丹窮困之故彼所應備之事仍令敬慎預備欽此臣自布隆吉爾地方十月初二日使噶爾旦多

爾濟來使賚文諭哈密回子頭目達爾漢白克曰聞逃來人言丹津鄂木布叛其叔與戰而他往阿喇卜灘率千許人自扎卜喀往投策旺喇卜灘噶爾丹自身不及千人在頽河無口糧牛羊無住屋冬衣云倘噶爾丹往投汝地可星速

遣人於噶爾旦多爾濟令噶爾旦多爾濟助汝
噶爾旦多爾濟乃我同朝之人汝其勿疑此外
又傳語噶爾旦多爾濟曰哈密若往報汝汝即
遣人來報一面往助哈密協力而行灘納秦都
爾白兒濟各路口子撥人小心駐防哨探阿南
達親身於十月十二日到肅州同提督李林隆
會商備綠旗兵二千在額濟內昆都倫等處仍
坐哨探聽併令李林隆防守邊疆各自整備訖

上報聞且以示議政諸臣曰阿南達處處備兵朕甚為之喜

諭學士朱都納謹飼馬匹

上諭議政諸臣曰厄魯特之桑札卜等於九月二十四日自庫冷白兒齊爾來降問之告曰丹濟拉歸見噶爾丹欲掠喀倫左側因大兵在喀倫四圍處處堵截是以懼而不進詐遣察罕哈什漢來約降聞翁金有米而往奪之又被守米之兵所敗噶爾丹

聞報而大恨曰僅仗汝兵搶奪而已今竟無所獲
不得已往哈密以馬易粟為食如不納則死戰於
是從庫冷白兒齊爾於二十二日起行向哈密而
去云今噶爾丹已行向哈密而去當乘此機會作
速勦滅茲大同現有備養馬匹著是軍即由內地
前往倘有不堪瘦馬即將彼汛地綠旗兵之馬換
取而去所過地方每宿酌取草料餵養再速差一
章京往學士朱都納處視朱都納解來七千匹之

馬不論何地相遇即止之令學士朱都納即於地
方取草料用心飼養此前去大兵不論何處相遇
乘此七千馬而去使一章京陪鄂欣速至阿南達
處使鄂欣在阿南達處居住倘噶爾丹在我大兵
未到之前已到哈密著阿南達等勿失機會集議
以為噶爾丹窮無所棲往投哈密乘機勦除誠
為緊要

皇上籌畫周詳俱當欽遵

諭旨而行查大同有前鋒八百鎗手護軍一千每旗
子母砲三門茲為勦噶爾丹往趨哈密應令此
軍全行其統軍者應以何人為將軍應給何項
將軍印應以何項大臣為叅謀伏候

上裁又學士朱都納處差一章京副都統阿南達處差
侍衛鄂欣與一章京俱令欽遵

上諭而行請行文知會陝西將軍督撫至每宿支給草
料應撥戶部章京前去

上曰另有商奪奏摺暫存速撥學士朱都納將伊解來
七千之馬聞旨之地即便駐札自彼地方支取草
料用心飼養

大同陣亡病故獲傷綠旗官兵以至僕從俱加
恩先是

欽差大學士阿蘭泰學士倭倫往查右衛大同陣亡官
兵還將所查陣亡人員照例給與身價及出征
身故得傷官兵僕從數目官兵所借官庫銀數

目開摺仍請

旨

上曰朕覽死亡人數中心惻然殊為不忍然此亦不得
歸罪於大將軍費揚古也彼特奉朕之命刻期而
來始致如此右衛官兵誠極苦矣今著將滿洲蒙
古漢軍官兵所借官庫銀兩盡行蠲免漢軍扣銀
之例不同自此旨下後漢軍借銀照常扣取除陣
亡者已給身價外其出征病故官兵僕從及得傷

官兵僕從等俱照所查數目如例現行給賞此係已經查明事件大學士不必前去著學士倭倫往驗一一給發倭倫到右衛後集衆宣旨將行查加恩之事遍諭諸大臣再備細開明發往大將軍處使之知之出征右衛兵到日亦著阿蘭泰召集曉諭至大同綠旗兵亦出征數次其陣亡病故得傷之人亦照例令學士倭倫驗賞如有無子嗣者則有賜祭例亦照例賜祭阿蘭泰出

召集諸大臣傳宣

上諭諸大臣跪奏曰

皇上之愛養兵丁至矣盡矣効力戎行彼分內之事也

蒙

皇上特遣大臣至右衛給陣亡身價銀今又將所借官
庫銀數十萬兩盡皆豁免得傷官兵僕從及出
征病故官兵僕從皆現銀給賞此不但衆官兵
生死均霑

厚恩臣等聞

聖上溫綸大賚亦無不傾心也

上諭皇太子曰十四日從托音胡圖克圖寺移於南關
下營十五日駐宿整備大宴達賴喇嘛之使達賴
汗之使瑚瑚腦爾八台吉之使歸化城喇嘛察哈
爾之將士歸化城之將士俱賜筵讌極其華整十
六日駐宿遂於西勒圖胡圖克圖寺觀看儼舞十
七日至二十日皆駐宿此數日自早至夜分無有

暇時從四方來之蒙古喇嘛及王與妃等以至兵
民婦女咸集進獻駝馬牛羊食物者絡繹不絕或
有至貧苦之人亦持馬絆絡首條革而來以獻其
忱自軍中來者為喀爾喀之善巴親王諾彙親王
毛明安之班第貝勒渣薩克之台吉納爾布白蘇
特之車陳即農吳爾占厄爾即亨之滾占哈坦把
圖爾喀爾喀之默爾根納顏之弟開木繩等有名
目之人問以噶爾丹之信息答云我等在軍前知

之甚詳噶爾丹信息今已急迫噶爾丹所居之地原係我等所居極其寒冽所食者雖無猶可食人馬之肉至衣服無有一夕遭遇極寒惟有凍斃而已更將何法以禦之我等抗愛山之地亦將為我困噶爾丹矣朕在此日事利濟人之離散者令其會合聞何處有彼婦人稚子即以價贖之令其完聚故來降者不絕以為善事而送出者亦衆九月朔一日費揚古伯所調右衛之兵前已疲勞又無

馬匹徒然調發以致困苦今回師將至故令親近
侍衛馬武帶牛五十隻羊二百隻湯羊十隻往迎
及到近地朕親於黃河岸迓而宴之乘便於鄂爾
多斯之地圍獵觀其形勢軍士從京師乘來之馬
俱於大同府餽養聞其甚肥現今隨朕前來之人
皆乘牧羣之馬駒而來其略瘦者即換新得肥馬
乘騎尚有餘剩駝馬之價甚賤駱駝佳者不過二
十金肥馬不過二十金此際未得噶爾丹確信堵

截勦滅皆周詳謀畫以行可將此繕寫奏聞

皇太后宮中咸令聞之

聖祖仁皇帝親征平定朔漠方略卷三十一